

Dakwah Melalui Pemanfaatan Sumber Daya Alam dan Kehidupan Lingkungan

MOHD SYUKRI YEOH ABDULLAH

ABSTRAK

Dakwah Islamiyah sebagai mesej yang dinamik boleh menyesuaikan diri dengan pelbagai situasi dan latar belakang masyarakat atau mad'u (sasaran dakwah). Mesej yang dinamik dan progresif ini akan lebih berkesan sekiranya *da'i* (pendakwah) mampu menterjemahkan pelbagai pendekatan dengan mengeksploitasi segala sumber dan kekuatan yang ada dengan bak. Justeru, artikel ini cuba melihat aspek pelaksanaan dakwah melalui pemanfaatan sumber daya alam dan kehidupan lingkungan.

PENDAHULUAN

Sebelum membincangkan masalah ini, terlebih dahulu perlu memahami pengertian sumber daya alam dan lingkungan kehidupan. Secara umum dapat dirangkumkan segala sesuatu yang berada di sekeliling manusia adalah bersifat bahan dan bersifat bukan bahan. Ia sama ada hidup ataupun tidak yang mempengaruhi kehidupan manusia. Nukilan Charles Darwin oleh Nilesen (1972) bahawa proses kehidupan meliputi tiga tahap yang saling terjalin, iaitu:

1. Penyesuaian sesama organisme yang wujud.
2. Perjuangan hidup.
3. Pengaruh lingkungan sekeliling terhadap penyesuaian tersebut.

Dengan adanya hubungan interaksi timbalbalik yang terjadi di antara makhluk hidup dengan lingkungan sekelilingnya, menunjukkan bahawa alam ini mempunyai jaringan kehidupan yang tersusun oleh arus energi dan arus bahan yang terhubungkait semua makhluk di dalam alam semesta (Barbara & Rene, 1974).

Hubungan interaksi makhluk dengan lingkungan sekelilingnya membentuk suatu sistem yang dikenali sebagai ekosistem. Manusia merupakan bahagian integral ekosistem tempat di mana ia hidup. Oleh kerana manusia dituntut memenuhi keperluan kehidupannya ia harus mempunyai tanggungjawab terhadap keutuhan ekosistemnya. Kerana kerosakan ekosistem itu akan memberi implikasi negatif kepada kesejahteraan dan kelangsungan kehidupannya.

Dengan demikian dapatlah dikatakan bahawa setiap individu makhluk mempunyai tugas untuk hidup dan mengadakan jalinan hubungan lingkungan sekelilingnya, sesuai dengan kepentingan pribadi mahupun kelompoknya. Sehubungan dengan apa yang dikemukakan tadi, maka penyesuaian kepada lingkungan sekeliling kehidupannya serta usahanya dalam organisasi (masyarakat) untuk meneruskan kehidupan sesuai dengan keadaan yang menurut pengalamannya (unsur tradisi) adalah terbaik (Phil Astrid S. Susanto, 1979: 148). Hal ini jelas menunjukkan bahawa tindakan rasional manusia merupakan faktor utama yang menghasilkan keadaan optimal kemasyarakatan. Dengan ini, proses ekonomi dan sistem politik akan berjalan secara harmoni. Mengenai hubungan manusia dengan lingkungannya boleh dilihat secara lengkap di dalam pemikiran Dr Muhammad Iqbal dalam karyanya *The Reconstruction of Religious Thought in Islam*.

Gambaran di atas memperlihatkan dasar hubungan alam lingkungan dengan ajaran Islam. Menurut al-Quran, Tuhan menciptakan segala isi langit dan bumi ini tidak sia-sia, melainkan dengan maksud tertentu (al-Dukhan: 30-31). Manusia diciptakan-Nya dalam bentuk seindah-indahnya (al-Tin 4-5). Kepada manusia dilimpahkan-Nya nilai-nilai kenikmatan, baik yang nyata mahupun yang tidak nyata (Luqman: 30), tetapi harus berusaha berikhtiar memanfaatkan sumber-sumber alam untuk kesejahteraannya. Allah tidak akan mengubah nasib manusia sehingga manusia ia mengubahnya sendiri (al-Ra'ad: 11). Manusia diangkat menjadi Khalifah di atas permukaan bumi ini (al-Baqarah: 30), ia diberikan keupayaan dan kecerdasan berfikir untuk menyebut nama-nama benda, menganalisis dan mengembangkannya menjadi ilmu pengetahuan (al-Baqarah: 31-33).

Intisari dari al-Quran di atas tersebut memperlihatkan bahawa untuk meneruskan dan mengembangkan kehidupan memerlukan dua perkara:

1. Sumber-sumber untuk mempertahankan keperluan hidup bagi individu dan masyarakat.

2. Pengetahuan mengenai prinsip-prinsip tingkahlaku masyarakat, yang memungkinkan manusia mengisi kehidupannya dan mempertahankan keadilan dan kedamaian.


Untuk keperluan-keperluan tersebut di atas, Allah sebagai penguasa semesta alam ini telah memberi segala kelengkapan dan kecukupan dari pelbagai sumber untuk dikajigali dan dimanfaatkan oleh manusia (Khurshid Ahmad, 1981). Dalam urusan rohani sosial dan kebudayaan manusia pula, Tuhan telah mengutus Rasul-rasul di kalangan manusia itu sendiri untuk membimbing umatnya ke jalan yang lurus (al-Syura: 13).

Kalau diperhatikan pula dari segi rakaman sejarah penyebaran agama Islam enam abad pertama, selain dorongan kesaksian iman dan juga latar belakang ekologi, suku-suku bangsa Arab yang semakin kering dari abad ke abad mendorong mereka berpindah ke sungai Nil, lembah Furat dan sungai Tigris (Gibb, 1951).

HUBUNGAN ALAM LINGKUNGAN MENURUT PERSEPSI ISLAM

Perhatian al-Quran terhadap alam dan lingkungan kehidupan adalah merupakan persoalan terhadap manusia yang cukup menarik. Keperluan atau pengaruh lingkungan terhadap agama Islam nampak dari segi ajarannya, peraturannya, penyebarannya, penghayatan kemasyarakatannya dan sebagainya. Kenyataan ini menunjukkan bahawa lingkungan itu pada dasarnya dapat diklasifikasikan dua, iaitu: lingkungan alam tabii dan lingkungan sosial. Lingkungan alam (tabii) boleh dikatakan segala sesuatu yang ada dan bukan kegiatan manusia contohnya seperti lautan, sungai, hutan, kampung halaman. Manakala lingkungan sosial ialah segala kegiatan manusia seperti pertanian, pembangunan, pendidikan dan kebudayaan (DPAI, 1979/1980).

Oleh yang demikian manusia sebagai makhluk sosial, hamba Allah telah diamanahkan jawatan Khalifah di permukaan bumi ini, seharusnya memelihara amanah tersebut. Amanah tentang bagaimana manusia dapat memelihara lingkungannya sepertimana terdapat dalam rajah berikut:



RAJAH 1: Amanah Manusia sebagai Khalifah

Rajah tersebut menunjukkan bahawa manusia harus berupaya mencapai keseimbangan dalam mengadakan hubungannya dengan Allah dan hubungannya dengan alam. Hal ini manusia harus berabdikan diri kepada-Nya. Meskipun pada hakikat implikasi dari pengabdian itu memberi manfaat kepada manusia itu sendiri, sedangkan bagi diri Allah tidak mempunyai erti sama sekali. Untuk itu, Allah hanya menunjukkan

jalan mana yang wajar dan benar yang dapat dilayani, begitu juga sebaliknya.

Hubungan manusia dengan dirinya sendiri, iaitu bagaimana manusia itu memenuhi keperluan sendiri seperti menjaga kesihatan, berpakaian bersih dan kemas, berhati lurus serta berpendidikan dan sebagainya.

Hubungan manusia dengan masyarakat, iaitu bagaimana manusia mengadakan hubungan (interaksi) dengan semua lapisan masyarakat yang meliputi semua peringkat usia. Dengan demikian manusia adalah komponen dari masyarakat tersebut.

Hubungan manusia dengan alam sekitar, iaitu manusia selaku Khalifah bertanggungjawab memelihara alam dan lingkungannya. Sehingga alam ini dapat dinikmati dan diambil manfaatnya. Keadaan ini harus berkesinambungan dari generasi ke generasi berikutnya. Dengan demikian manusia dapat memelihara dan memanfaatkan apa yang ada di sekelilingnya baik hutan, haiwan, tumbuh-tumbuhan, air mahupun berupa apapunya. Justeru itu, dalam memelihara sumber daya alam dan lingkungan kehidupan serta pengembangannya memerlukan penyelesaian bersama. Kerana masalah lingkungan bukan sekadar akibat perindustrian ataupun teknologi sahaja, tetapi juga kesan kemiskinan, kepadatan penduduk, rendahnya taraf pendidikan, pertambahan pusat hiburan, merebak penyakit, perubahan iklim, meratakan bukit untuk pembangunan, polemik politik, pengangguran dan sebagainya. Kesemua ini mengganggu ketenteraman lingkungan kehidupan masyarakat manusia itu sendiri.

BATASAN DAN KEGIATAN DAKWAH

Dalam merealisasikan kaedah dakwah dan hubungannya dengan pemeliharaan alam yang berlandaskan ajaran al-Quran yang dijelaskan di atas tersebut. Dalam hal ini dapatlah dilihat daripada dua segi, iaitu:

BATAS WADAH DAKWAH

Menurut fitrah dan kenyataan hakikat manusia itu sebagai makhluk sosial, memerlukan interaksi sesama jenisnya untuk memenuhi keperluannya sama ada jasmani mahupun rohani. Sebagai makhluk budaya, manusia telah menciptakan lambang-lambang sebagai media hubungan dan interaksi sesamanya. Menurut Ibn Khaldun (1963) masyarakat manusia dan kebudayaannya mempunyai jalinan saling berhubungkait di antara satu sama lain sebagai kesatuan.

Oleh itu, perbuatan manusia sebagai makhluk sosial budaya menjadi sasaran dakwah, ertinya perlu menyentuh masyarakat dan kebudayaan di mana manusia itu berada. Tingkah laku manusia sentiasa berada di dalam suatu jaringan keadaan yang mewujudkan perbuatan. Sistem ini sesuai dengan keadaan, meliputi empat komponen sistem, iaitu organisme, kepribadian, sosial dan kebudayaan.

Masyarakat dan kebudayaan masing-masing mewujudkan sub sistem sosial dan kebudayaan, sedangkan eksistensi manusia sebagai makhluk sosial jasmani dan rohani, masing-masing mewujudkan sub-sistem organisme dan sub sistem kepribadian. Keempat sub sistem ini berkaitannya dengan sistem perbuatan/tindakan. Sebagai makhluk hidup, perbuatan manusia tidak terlepas daripada susunan organisme yang diwarisi secara fizik. Hubungan masyarakat dengan sistem organisme terdapat pada kepentingan pemeliharaan terhadap keperluan kehidupan. Perkembangan keperluan kehidupan ini relevan dengan pertumbuhan teknologi yang mewujudkan aspek ekonomi dan kesejahteraan masyarakat (Husein, 1977).

Dari kenyataan sosial menggambarkan bahawa jalinan hubungan antara individu manusia sama ada secara fizik (jasmani) mahupun mental (rohani) dengan masyarakat dan kebudayaannya ditentukan dan dipengaruhi oleh keadaan lingkungan hidup daripada diri sendiri. Sehubungan ini, Malaysia mempunyai sebilangan masyarakat yang beragama Islam dan hidup dalam lingkungan tradisi yang sekaligus sangat menyintai agamanya. Di samping itu, ilmu pengetahuan dan teknologi juga turut membawa perubahan kehidupan sosial dan lingkungan masyarakat itu. Pergeseran sosial dan nilai-nilai normanya kepada kebudayaan dan masyarakat moden menyebabkan ruanglingkup wadah dakwah semakin luas. Oleh itu, perlu pula pengeseran atau perubahan sistem dan kaedah dakwah akibat tuntutan keadaan tersebut di atas.

Dengan demikian, dakwah memasuki jangkauan wadah yang luas tanpa batas, iaitu meliputi semua lapisan masyarakat lingkungan kehidupan manusia, termasuklah seluruh sumber daya alam yang wujud di kelilingnya (H. Kafrawai 1976).

Perluasan jangkauan dakwah agar berlandaskan kepada bijaksana dan teladan yang baik (al-Nahl: 125) dan melaksanakan amanat Allah bahawa manusia perlu sedar terhadap posisinya dan tujuan sebagai umat Islam (ali-Imran: 110) membawa orang menegakkan kebajikan dan kesejahteraan serta mencegah kemungkaran.

Pelaksanaan tugas ini sudah pasti menyelusuri lingkungan industri, pasar, stesen, pelabuhan, pejabat bangunan bertingkat, sawah serta

meliputi seluruh lapisan masyarakat bermula daripada petani, pegawai, nelayan, seniman, pedagang buruh, intelektual dan sebagainya. Oleh itu, tenaga para *da'i* dan peranannya dalam program pemeliharaan lingkungan kehidupan dan sumber daya sangat penting kerana mereka termasuk salah satu komponen yang bergerak bersama rancangan nasional seiring dengan fungsi dakwah dengan kaedah dan sistemnya.

Dengan demikian, implikasi perubahan-perubahan penting dalam masyarakat moden dan zaman teknologi, bimbingan pelaksanaan dakwah tidak hanya terbatas pada masalah *amar ma'ruf* dan *nahi mungkar* dan seruan *ubudiyyah* sahaja, tetapi juga meliputi segenap sasaran lingkungan kehidupan dan semua lapisan masyarakat. Sehingga alat media yang digunakan juga meliputi pemanfaatan sistem komunikasi moden, dan tidak hanya tertumpu kepada alat dan kaedah tradisional (H. Kafrawi, 1976).

Terdapat beberapa jalur dakwah yang dapat diguna pakai dalam rangka memasyarakatkan pemeliharaan lingkungan kehidupan, di antaranya:

- a. Jalur pendidikan seperti pendidikan formal, pendidikan informal dan non formal.
- b. Jalur media massa, iaitu melalui akhbar, majalah, buku, internet dan sebagainya.
- c. Jalur tatap muka, iaitu diskusi, ceramah, forum dan sebagainya.
- d. Jalur organisasi NGO dan badan-badan kerajaan seperti rakanmuda dan sebagainya.
- e. Jalur mimbar, iaitu melalui berpidato, ceramah, khutbah dan sebagainya.

Hal ini jelas menunjukkan bahawa peranan dakwah sangat penting dalam rangka memasyarakatkan pemeliharaan lingkungan kehidupan, motivasi agama, keimanan dan ketaqwaan mahupun sebagai wahana persaudaraan dalam mewujudkan lingkungan yang sesuai, sehingga sasaran dakwah meliputi dua perkara, iaitu:

- a. Sasaran horizontal, iaitu mengembangkan sayap dakwah ke seluruh penjuru di mana ada umat manusia.
- b. Sasaran vertikal, iaitu meningkatkan kualiti dakwah, bahan, kaedah dan sistemnya, serta

pemanfaatan pelbagai sarana sumber daya alam dan teknologi yang menunjang kejayaan.

SUMBER DAYA DAN LINGKUNGAN KEHIDUPAN SEBAGAI MEDIA DAKWAH

Tinjauan dakwah yang dilihat dari segi luaran terhadap pemeliharaan kehidupan membawa maksud bahawa dakwah merupakan satu gerakan dan, sumber daya dan lingkungan kehidupan sebagai sasaran dakwah. Dalam hal ini beberapa ayat suci al-Quran memperlihatkan gambaran Allah menjadikan manusia dalam bentuk yang seindah-indahnya (al-Tin: 4-5) dan menundukkan semua yang ada di atas permukaan bumi kepada manusia sebagai rahmat dari-Nya (al-Jathiyah: 13). Al-Quran turut menjelaskan bumi sebagai hamparan dan langit sebagai atap merupakan kurnia Allah kepada manusia untuk di nikmati dan seterusnya memberi peringatan kepada mereka supaya tidak menlaggar batas (al-Araf: 54-56). Ajaran al-Quran juga memperlihatkan gambaran bahawa seluruh daya alam dan lingkungan kehidupan, serta segenap yang wujud di alam ini turut ikut memberi motivasi kepada manusia itu memelihara dan melestarikannya. Kerana eksistensi alam dan manusia sesungguhnya sangat berhubung kait sama ada yang tersurat mahupun yang tersirat. Manusia dituntut saujana mengamati dan memahami kreativiti proses penciptaan alam semesta. Bila hal ini berlaku, manusia akan berusaha untuk memelihara dan melestarikannya secara moral dan menghancurkan hal-hal yang menimbulkan malapetaka sosial sebagai perealisasikan kesinambungan tajali-Nya. Aktiviti dan kreativiti secara berterusan diperlihatkan oleh Allah melalui pemanifestasian perjalanan alam semesta ini. Dengan demikian, di sebalik panorama alam semesta ini yang meliputi sumber daya dan lingkungan kehidupan menunjukkan kenyataan tentang eksistensi ke-Esaan Tuhan sebagai Maha Mencipta dan Mengatur. Sehubungan itu, semua yang ada di sekeliling lingkungan kehidupan manusia itu memotivasikan dakwah kepada manusia supaya ikut bertanggungjawab dalam melestarikannya demi untuk kesejahteraan masyarakat manusia.

Kerana itu, tanggungjawab umat manusia khususnya umat Islam di manapun ia berada harus memahami bahawa sumber daya dan lingkungan kehidupan adalah selain sebagai bukti kekuasaan Allah Maha Pemberi kesejahteraan dan keseimbangan hidup, ia juga sebagai subjek penggerak dakwah dan motivasi kepada umat manusia. Demikian juga manusia sebagai anggota masyarakat dalam sub-sistem

organisme selain berpartisipasi kerana motivasi untuk pembangunan umat manusia, tetapi juga kerana tarikan dakwah bahawa alam semesta ini adalah ciptaan dan anugerah Allah kepada manusia untuk dimanfaatkan dan dilestarikan yang sekaligus dikembangkan. Justeru itu, manusia harus mengintropeksi diri di samping dengan ekstropeksi. Setelah menemukan dirinya dan alam, akan terungkap rahsia menyebabkan manusia akan menaklukkan alam baik mikro mahupun makro untuk kemaslahatan umat manusia itu sendiri.

Setiap makhluk yang ada di alam ini dan lingkungan kehidupan manusia mengandungi dwi saluran: (i.) Alam lingkungan kehidupan merupakan saluran rahmat dari Khalik kepada makhluk. (ii.) Alam lingkungan kehidupan merupakan salur syukur dari makhluk kepada Khaliknya. Dari huraian di atas tersebut dapatlah di klassifikasikan kepada dua bahagian, iaitu

- a. Manusia sebagai makhluk sosial yang hidup merupakan sumber daya yang potensi, sebagai khalifah Tuhan di atas permukaan bumi wajib mencerminkan sifat-sifat mulia melalui tingkahlaku, ucapan, ciptaan dan karyanya, kehidupan rumahtangga serta kehidupan dalam masyarakatnya. Sehingga seluruh sikap tingkah laku kehidupan menjadi mesej dakwah kepada masyarakat.
- b. Sumber daya dan lingkungan kehidupan harus dipelihara dan dilestarikan untuk kesejahteraan umat manusia, sehingga ia dapat memberi keindahan, kedamaian yang menimbulkan moral yang baik terhadap alam yang akhirnya menumbuhkan rasa keimanan dan keyakinan eksistensi kebesaran Allah S.W.T.

KESIMPULAN

Manusia sebagai makhluk budaya boleh melakukan segala aktiviti secara kreatif, memanfaatkan potensi sumber daya dan lingkungan kehidupan sebagai subjek dakwah sekaligus sebagai aspek method dakwah di samping sebagai alat (media) dakwah dalam ajaran Islam. Dengan perkataan lain, dalam diri manusia dengan segala tingkahlaku dan sikap, dan dalam sumber sumber daya alam dan lingkungan hidup itu mengandungi tenaga gerakan yang berfungsi sebagai method dakwah.

RUJUKAN

Barbara Ward dan Rene Dubes. 1974. *Hanya Satu Bumi, Perawatan dan Pemeliharaan Sebuah Planet Kecil*. Jakarta: Grandemia.

- Direktorat Penerangan Agama Islam, 1979/1980. *Lingkungan Hidup*. Jakarta: Depag. Ri.
- Gibb, H.A.R. 1951. *Moderns Trends In Islam* (Aliran-aliran dalam Islam) terj. L. E. Hakim. Jakarta: Tintamas.
- H. Husein Seqaf. Juni, 1977. "Masyarakat Sebagai Lapangan Dakwah". *Majalah Mimbar Ulama*. Nomor 2. Jakarta.
- H. Kafrawi "Ruang Lingkup Dakwah". *Majalah Mimbar Ulama*. Nomor 5 Jakarta.
- Ibn. Khaldun. 1963. *Tentang Masyarakat Dan Negara*. Terj Osman Raliby. Jakarta: Bulan Bintang.
- Khurshid Ahmad. 1981. *Islamic Basic Principles And Characteristic*. (Islam Prinsip Dasar Dana Karateristiknya) Terj. Mahyuddin. Bandung: ITB.
- Niessen, N.J.M. 1972. *Social Ecologi*. Utrech: Spectrum.
- Phil Astrid S. Susanto. 1979. *Pengantar Sosiologi Dan Perubahan Sosial*. Bandung: Binacipta.
- Samin Rosyik Nur. 1980. Makalah "Adat dan Hubungannya dengan Pelestarian Alam dan Lingkungan Hidup" Seminar Sumber Daya Alam Dan Lingkungan Hidup tahun 2000-an. Ujung Pandang.

Jabatan Pengajian Dakwah & Kepimpinan
Fakulti Pengajian Islam
Universiti Kebangsaan Malaysia
43600 UKM, Bangi, Selangor
Malaysia.
e-mel: syukri@ukm.my